

ՀՈՂԱՅԻՆ ԽՆԴԻՐԸ ԱՆԴՐԿՈՎԿԱՍՈՒՄ ¹⁾

II

Մեր առաջին յօդաձում Անդրկովկասի Հողային խնդրի մասին մենք կանգ առանք հետեւեալ կէտերի վերայ.

Հողի (այսինքն Հողի սեպհականութեան, Հողի տիրապետութեան և Հողից օգուտի) մասին օրէնսդրութիւնները լուսաւորեալ երկիրներում կազմել են նոյն այդ երկիրների պատմական զարգացման համար մեծ էպօքներ:

Այդ հողատիրական օրէնսդրութիւնները արգասիք են եղած հասարակաց կարծիքի զօրեղ հոսանքների, որոնց նախապատրաստողն են եղել մամուլը, գրականութիւնը:

Անդրկովկասում, սուսաց տիրապետութեան օրերով, կատարւած են բազմաթիւ փոփոխութիւններ հողատիրութեան մէջ: Հողային պայմանները կանոնաւորելու թէ միտքը և թէ ամբողջ քննադատական պրօցեսը կատարել են բարձր կառավարչական շրջաններում:

Հողային օրէնսդրական ակտերը մեզանում անցել են աննկատ, եղել են փոփոխական, առանց յարատեւութեան և ունեցել են յաճախ միայն քաղաքական բնաւորութիւն, որպէս այդ լինում է դեռ ևս ստոր կուլտուրայի մէջ գոնեւող նւաճւած երկիրներում, ուր քաղաքացիութիւնը դեռ ևս հաստատ արմատ չի բռնում:

Մենք յայտնեցինք, որ Անդրկովկասում, մասնաւորապէս Թրքահայկական նահանգներում մոցրած Հողային օրէնքները մի խառն արդիւնք են նախ թուրքական և հայկական նախկին կարգերի, ապա ուսասական հայեացքների հողի, կալւածատիրոջ և զիւղացիների

¹⁾ Յօդաձ առաջին տես «Մուրճ», 1889 թ. սեպտեմբեր. № 9:

մասին թէ 1861 թւականի ռուսական հողային ընթօրմներից առաջ և թէ ընթօրմներից յետոյ և երրորդ՝ արեւմտեան-եւրոպական ազատիչ ազդարական ընթօրմների ազդեցութեան:

Ապա մենք յայտնեցինք, և թէ մեր Կովկասեան հողատիրութեան օրէնքները ոչ միայն յաճախ փոփոխուել են, այլ և ներկայումս նոքա վերաքննութեան առարկայ են կառավարչական շրջաններում, և յորդորեցինք մեր թէ հայ և թէ ռուս մամուլին՝ սրտին մօտ առնել հողային խնդիրը և պարզաբանելով դորա վերաբերեալ բոլոր հանգամանքները՝ աշխատել երկրի պահանջները զգացնել տալ բոլոր ընթերցող հասարակութեան՝ հասարակաց կարծիք կազմելու նպատակ:

Այս բոլորը մի անգամ հաստատելուց յետոյ, մենք անցանք Կովկասեան և մասնաւորապէս Թրքա-հայկական նահանգների հողատիրութեան ուսումնասիրութեանը, կանգ առնելով առ այժմ միմիայն պետական (գօսուղարատւեննիէ) կուլաժ գիւղացիների հողատիրութեան վերայ. խոստանալով հետեւեալ անգամների համար պարզել զոցա վերաբերեալ ցայժմ կառարաւած ընթօրմների էութիւնը:

Այս մէկ բանը կրկնենք անցեալ յօդաւածից, քանի որ այդ ամենաանհրաժեշտն է Կովկասեան հողատիրութեան ուսումնասիրութեան համար: «Անդրկովկասի նահանգները ամենից առաջ պէտք է, վարչական տեսակէտից, բաժանել երկուսի.—նահանգներ, ուր հողերը կառավարուում են քաղաքացիական օրէնքներով, և նահանգներ, ուր հողերը դուրս են սովորական վարչութիւնների ձեռնհասութիւնից: Այս վերջիններին պատկանում են՝ Զաքաթալի, Դաղստանի, Կարսի ու Բաթումի շրջանները, որոնց նկատմամբ ընդհանուր հողատիրական օրէնքները զօրութիւն չ'ունին և դուրս են պետական հողերի միւնիստրութեան ձեռնհասութիւնից: Այդ շրջաններում տիրում են բացառիկ օրէնքներ: Իսկ ուր մտած է կանոնաւորութիւն հողերի նկատմամբ և հողերը ենթարկւած են որոշ քաղաքացիական օրէնքների, դոքա են՝ Թիֆլիսի, Քութայիսի, Նրեանի, Գանձակի և Բաքուայ նահանգները:

«Այդ նահանգներում գոյութիւն ունին երեք տեսակ հողատիրութիւն: Երկրիս հողերի մի մեծ մասը պետութեան սեպհակաւնու-

Թիւն է, մի նմանապէս խոշոր մասը՝ աղնական կալաճատէր դասակարգի սեպհականութիւն է, իսկ համեմատապէս մի փոքրիկ մասը՝ գիւղացիների սեպհականութիւն է:

«Համեմատ այդ երեք կարգի սեպհականութեան, գիւղացիները կենում են կամ պետական հողերի վերայ, կամ աղնական կալաճատէրերի և կամ իրանց սեպհական հողերի վերայ:

«Այն գիւղացիները, որոնք կենում են պետական հողերի և կալաճատէրերի հողերի վերայ, ծանաչւած են որպէս պետական գիւղացիներ (գօսուդարստեննիէ կրէսոյեանէ): Այդպէս է օրէնքով: Բայց անխտիր կերպով նոքա այդ անունով չեն կոչուում սովորական լեզուում և նոյն իսկ գրականութեան ու պաշտօնական թղթերի մէջ: Պետական ընդունւած է անուանել միմիայն այն գիւղացիներին, որոնք կենում են պետական սեպհականութիւն համարւող հողերի վերայ, սովորական լեզուում կոչուում են կալաճատիրական գիւղացիներ (վլադէ՛լեսկիէ կրեսոյեանէ):

Բայց թէ ինչու նոքա, օրէնքի առջև, անխտիր կերպով պետական գիւղացիներն են ծանաչւած, այդ մենք բացատրեցինք նորանով, որ օրէնսդիրը, միևնոյն անունը տալով երկու կարգի գիւղացիներին՝ կամեցել է հասկացնել, որ թէ պետական հողերի և թէ կալաճատէր աղնականների հողերի վերայ բնակւող գիւղացիները հաւասարապէս ազատ գիւղացիներ են և որ թէ դատարանի առաջ, թէ տուրքերի կողմից նոքա նմանապէս հաւասար են (այս զանազանութեամբ միայն, որ պետական հողերի վերայ բնակւողները ամբողջ տուրքը վճարում են տէրութեան գանձարանին, մինչդեռ կալաճատիրական հողերի վերայ բնակւողները նոյն գումարը վճարում են՝ մասամբ կալաճատէրին, մասամբ տէրութեան, բայց երկուսի տուրքերն էլ հաւասար են):

Այն հողացին ըէֆօրմները, որ կատարւել են ներկայ դարումս առևտաց իշխանութեան ձեռքով, Անդրկովկասի թրքա-հայկական նահանգներում, վերաբերում են հենց միմիայն աղնական կալաճատիրական հողերին, որոնք որպէս իմացանք, թէև բաւականին խոշոր բայց և այնպէս միայն մի մասն են կազմում նոյն թրքա-հայկական նահանգների հողերի: Իսկ միւս կողմից վերաբննելի հողացին օրէնքները և կարգերը վերաբերում են ոչ միայն կալաճատիրական հո-

ղերին, այլ և պետական հողերին: Մամուլի կողմից ուռույնասիրելու և քննելու առարկան այդ իսկ պատճառով պետք է կազմել ոչ միայն կալաճատիրական հողերին վերաբերեալ կարգ ու կանոնները, այլ և պետական հողերին վերաբերեալները: Բայց մինչդեռ պետական հողերի մասին օրէնսդրութիւնը պարզ է և մի քանի խօսքով բացատրող, կալաճատիրական հողերինը, ընդհակառակը, աւելի բարդ է և կրել է բազմաթիւ փոփոխութիւններ, առանց որոնց կանխաւ ծանօթութեան անկարելի է խնդրի քննութեան մէջ մի քայլ առաջ անել: Ահա այդ պատմական մասին է, որ այժմ դիմում ենք:

Թրքա-հայկական նահանգներում ազնւական կալաճատիրական դասակարգին պատկանողները կրում են այլ և այլ անուններ՝ բէգ, աղալար, մելիք և միւլքաղար: Կալաճատիրական դասակարգ, որ գոաւ ուսսաց իշխանութիւնը մեր երկրում՝ զոքա էին: Բայց նախ որ յայտնի չէր, թէ զոքա ինչ իրաւունքների տէրեր էին և ոչ էլ զոքա ամենքի իրաւունքները իրար հետ հաւասար էին: Բէգեր գոյութիւն ունէին այն նախկին խաչնութիւններում, որոնց տեղը այժմեայ Գանձակի և Բաքուայ նահանգներն են: Աղալարները գոյութիւն ունէին նախկին վրաց իշխանութեան Թրքա-հայկական տեղերում, որ այժմ կազմում են Բօրչալուի, Ղաղախի և Գանձակի գաւառները: Մուլքաղարներ գոյութիւն ունէին նախկին Հայկական երկրում (Արմառե. օբլաստ), այժմեայ Երևանի նահանգում: Մելիքներ (հայ) կային Ղարաբաղում (Գանձուկի նահանգի մասը): Բէգեր և այլ տիտղոսաւոր անձեր կային նաև Ախալցխայի փաշալիկում (այժմեայ Ախալցխայի և Ախալքալաքի գաւառները):

Երևանի նահանգում, բացի միւլքաղարները, կային նաև թիուլի տէրեր, բայց 1840 թւականին թիուլը վերածւեց տէրունական հարկի, այնպէս որ այդ դասակարգը ջնջւեց:

Բացի այդ բոլոր տիտղոսատէրերից, կային և կան նաև խաներ, որոնց իրաւունքները սակայն բէգերի հետ հաւասար պետք է համարել, այնպէս որ խանական դասակարգ առանձնապէս գոյութիւն չ'ունի:

Այդ բոլոր տիտղոսաւորները ունէին և ունեն յարաբերութիւններ հողերի հետ, որոնք կամ բնակեցրած են գիւղացիներով և կամ բնակեցրած չեն։ Ուրեմն նոքա նոյնաժամանակ ունէին և ունեն յարաբերութիւններ ոչ միայն հողերի, այլ և գիւղացիների հետ, որոնք, օգտւելով այդ հողերից, յայտնի պարտականութիւններ ունէին դէպի այդ բարձր դասակարգի անձերը։

Որոնք էին այդ փոխադարձ պարտաւորութիւնները և որոնք էին առհասարակ բարձր դասակարգի իրաւունքները թէ հողերի և թէ գիւղացիների նկատմամբ՝ դոցա մասին չը կար ոչ օրէնսդրութիւն, ոչ գրաւոր յիշատակարաններ, ոչ վկայութիւններ։ Այդ պատճառով այդ աւարկայի վերայ դանազան կերպով էին նայում տեղական ուռւ կառավարիչները։ Սակայն սոցա մեծ մասը ընդունում էր, որ բէգերը և աղալարները կամ ժառանգական, կամ ցմահ և կամ ժամանակաւոր իրաւունքն ունէին գիւղացիներից սովորութիւնով որոշած տուրքեր ստանալու, բայց միմիայն այն պատճառով, որ նոքա էին կառավարում գիւղերից շատերը ոստիկանական կարգով։ Խաների իշխանութեան անկումով, թրքական երկիրներում (Խանձակի և Բաքուայ նահանգները) կառավարչութիւնը յանձնեց կոմենդանտներին, օկրուժնի նաչալնիկներին և ուչաստկովի զասէդատէլներին, որոնք, որպէս իւանութիւնների ժամանակ էր, գիւղերի կառավարչութիւնը յանձնում էին բայց ոչ միայն բէգերին և հասարակ գիւղացիներին, ղեկավարւելով անցողական հանգամանքների բացառիկ պայմաններով և կամ կամայականութիւնով։

Նոյն էր և Վրաստանի թրքական գաւառներում (այժմեայ Բօրչալուի, Ղազախի և Դանձակի գաւառների սահմաններում), ուր գիւղերի և թափառականների բնակատեղիները գտնւում էին աղալարների ոստիկանական կառավարչութեան ներքոյ։ Աղալարները գիւղացիների վերայ ոչ միայն ոստիկանական իշխանութիւն էին բանեցնում, այլ և գաղաստանական, թէև կարելի էր ապելացիա տալ աւելի բարձր իշխանութեան։ Աղալարների դասակարգին պատկանում էին այլ և այլ տիտղոսների մարգիկ՝ աղալարներ, սուլթաններ, վէքիլներ և, հայոց գիւղերում, մելիքներ։

Հայոց նահանգում (այժմեայ Նրեանի նահանգ) երկու տեսակ հողատիրութիւն կար՝ միւլք և թիուլ։ Այդ նահանգի գիւղերի հո-

դիրը սովորաբար բացառապէս գիւղացիներին ձեւքումն էին, որոնք իրանց հողային բերքերի $\frac{2}{30}$ մասը տալիս էին տէրունական հարկահաններին: Այդ տուրքը երկուսի էր բաժանուում՝ մէկ մասը կուլում էր միւլք և հասնում էր միւլքդարներին, իսկ միւս մասը կուլում էր թիուլ և հասնում էր տէրութեան զանձարանին:

Միւլք ստանալու իրաւունքը տրւում էր պարսիկ կառավարութիւնից պետական ծառայութեան մէջ գտնւողներին, որպէս նաև գիւղերի կառավարիչ տարզաներին և տանուտէրերին: Այդ իրաւունքը ժառանգական էր: Տէրութիւնը երբեմն մէկին կամ միւսին շնորհում էր բացի միւլքից, նաև թիուլ ստանալու իրաւունքը, բայց միայն ցմահ: Խանը իւր կամքով կարող էր թիուլը դարձնել միւլքի կամ երկուսն էլ միացնել և մէկ մարդու տալ: Որովհետև միւլքը ժառանգական էր և կարող էր ծախուել ում և կամենար միւլքադարը, այդ պատճառով միւլքի տէրերը դեռ ևս անպատճառ աղնականներ չէին. բայց երբ 1840 թւականին ռուսաց տէրութիւնը և դորա տեղ ծխային հարկ նշանակեց, միւլքադարները առանձին նշանակութիւն ստացան, որպէս երկրի կալւածատէր դասակարգ:

Թրքա-հայկական նահանգներում, նոցա նշանելու առաջին տարիներում, բնական է, որ ոչ բէգերի և ոչ աղալարների իրաւունքները որոշ չէին ռուսաց կառավարութեան համար: Այդ պատճառով, այդ նկատմամբ, գործը թողած էր տեղական աւանդութիւններին և ռուսաց կառավարիչների կամայականութեան: Այդ պատճառով յետագայ տարիներում յատուկ մասնաժողովների ձևով կառարեցին հետազոտութիւններ իմանալու համար, թէ ինչ իրաւունքով այդ տիտղոսաւորները վայելում են երկրի մէջ այն մեր վերը չիշած արտօնութիւնները: Այդ գործի սկիզբը դրեց գէներալ Երմօլովը, 1817 թ., որը յանձնեց մի կառարողական մասնաժողովի՝ հաւաքել տեղեկութիւններ, վերաբերեալ աղալարների իրաւունքներին նախկին Վրաստանի երեք թրքական դաւառներում (Բօրչալուի, Ղաղախի և Գանձակի): Դոցա հիման վերայ Երմօլովը 1824-ին կազմեց մի կանոնագրութիւն պօլօժենիէ) աղալարների իրաւունքների և պարսոականութիւնների մասին: Նոյն Երմօլովը, մի քանի փոփոխութիւններով, հաստատեց Ղաղալի գաւառի համար դեռ 1812-ին կոմենդանդ Պօնամարիովից կազմած կանոնադրութիւնը այդ դաւառի գիւղերը կառավարող նախնիների և բէգերի համար:

Հայկական երկիրը (Армянская Область, այժմեայ Երևանի նահանգը) նւաճելուց և այդտեղ օբլաստնոյ կառավարութիւն հաստատելուց յետոյ կոմս Պասկևիչը կաբգադրեց որ բոլոր նոքա, ովքեր անշարժ կալւածներ ունին, իրանց վկայաթղթերը ներկայացնեն: Որոշւած ժամանակը սակայն սուղ լինելով, օբլաստնոյ կառավարութիւնը, երգւեալների վկայութիւններով բաւականանալով, վկայաթղթեր տւեց սնշարժ կալւածներ ունեցողներին:

Ախալցխայի նախկին փաշալիկում (այժմեայ Ախալցխայի և Ախալքալաքի գաւառները) Պասկևիչը յայտնեց տեղական բէգերին, որ ով նոցանից կը կամենայ հեռանալ Թիւրքիա, կարող է իւր անշարժ կայքերը ծախել: Նոքա ծախեցին, բայց ոչ միայն իրանցը, այլ և շատ տէրունական հողեր, որոնք և մնացին նոր աւնողների ձեռքում:

Այդպէս էր դրութիւնը երկիրս նւաճելու սկզբնական տարիներում, մինչև որ Անդրկովկասում 1841 թւականին մացրեց քաղաքացիական կառավարութիւնը: Այժմ արդէն կարօտութիւն զգացեց, որ զիւղացիների հողերից օգուելու եղանակները որոշեն ոչ թէ ժամանակաւոր կանոններով, այլ օրէնսդրական կարգով:

Քաղաքացիական կառավարութիւնը մտցնելուց առաջ, կատարեց վերաբնութիւն (մէլիդիա) Անդրկովկասիան բոլոր վարչական հիմնարկութիւնների սենատոր Գանի կողմից: Վերջինս կասկած չայտնեց աղալարների և Բէգերի հողատիրական իրաւունքների տարածութեան մասին: Սենատոր Գանը ընդունեց, որ աղալարները մի զասակարգ են, որը կուլած էր ոստիկանական կառավարութիւն վարելու գիւղերում. և որ եթէ աղալարները հողային իրաւունքներ ունին, (արդիւնքի մասը ստանալու և այլն) այդ բղխում է ոչ թէ նորանից, որ այդ հողերը նոցա սեպհականութիւն են, այլ միայն վարձատրութիւն է նոցա ծառայութեան համար: Բէգերի մասին նա յայտնեց, թէ նոքա չունին ժառանգական իրաւունք հողերի համար և որ ուրեմն Բէգի մահով վերջանում է այդ իրաւունքը և ժառանգներին կարող է անցնել նա միայն բարեհաճութեամբ տէրութեան: Միւլքաղալարների և թիւուլի տէրերի մասին Գանը յայտ-

նեց, որ թիուլները պետական գիւղեր են, որոնց եկամուտները տրուում էին յօգուտ այն անձերի, որոնց նոքա պարգևում էին. իսկ միւլքերը ժառանգական կալաճներ են, որոնց տէրերը ստանում են եկամուտի $\frac{2}{5}$ մասը, իսկ $\frac{3}{5}$ մասը տէրութեան զանձարանն է մըտնում:

Սենատոր Գանի այս կարծիքները, որ ընդունեց նաև Անդրկովկասեան երկրի կառավարչութեան գլխաւոր խորհուրդը, արտափայլեցին տէրութեան կարգադրութիւնների մէջ: Քանի որ աղալարների հողային իրաւունքները հիմնուում էին նոցա ոստիկանական ծառայութեան վերայ, և քանի որ 10 ապրիլի 1840 թւականի օրէնքով, Անդրկովկասի քաղաքացիական կառավարչութեան մասին, աղալարները հեռացւում էին ոստիկանական պարտադիր ծառայութիւնից, ուստի նոքա պէտք է զրկէին նաև իրանց ցայժմ վայելած հողային իրաւունքներից:

Այդպէս էլ վճռեց: Իբր վարձատրութիւն այն արտօնութիւնների համար, որ տրւած էր նրանց 1818 թւականի կանոններով, որոշեց տալ նրանց դրամական ռոճիկ ցմահ, աւելացնելով գիւղացիների հարկը: Մելիքների և աղալարների հայկական 11 գիւղերում նոքա բոլորովին հեռացրեցին պաշտօններից առանց որ և է վարձատրութեան:

Խորհուրդի այդ որոշումը բարձրագոյն հաստատուեց 28 մայիսի 1841 թւականի:

Բէգերի համար Կովկասեան խորհուրդը վճռեց նոյնը, բայց դրան հակառակեց պատերազմական միլիտոր իշխան Չերնիշևը, որը կարգադրեց քննել զործը և որոշել Բէգերի իրաւունքները առանձին կոմիտետի ձեռքով (կոմիտէտ Բէգերի իրաւունքների մասին): Կոմիտէտը վճռեց, որ Բէգերը ունին ժառանգական սեպհականութեան իրաւունք բնակեցրած հողերի վերայ, բայց որ թուրքերի մէջ ճորտութիւն, ռուսաց մօքով, չը կայ: Այդ և աղալարների համար կազմած կոմիտէտները որոշեցին, որ աղալարների նշանակութիւնը նոյն է ժողովրդի աչքում, ինչ բէգերինն է և որ ուրեմն նոցա բոլորի դրութիւնը պէտք է նոյն սկզբունքներով որոշել:

Այսպէս էր գործի դրութիւնը, երբ, Կովկասեան փոխարքայ նշանակեց իշխան Վօրօնցօւը, որի ուշադրութիւնը կայսր Նիկողայոսը

դարձրեց այս կարևոր խնդրի վերայ յայտնելով, որ «Աղալարներից հողեր խլելը սխալ գործ էր և որ նրանց պետք է այն վերադարձնելու»

Իշխան Վօրօնցօւը ներկայացրեց Թագաւոր-կայսրին, փետրուար 1846 թ., իւր ղեկավարութեամբ գեներալ լէյտենանտ Լադինսկու կազմած կանոնադրութիւնը երկրիս բարձր մահմեդական դասակարգի հողացին իրաւունքի և գիւղացիների ու հողատէրերի փոխադարձ յարաբերութիւնների մասին, որ քննեց Կովկասեան կոմիտէտը: Փետրուարի 2-ին 1846 թ.-ին բարձրագոյն հաստատուած այդ կանոնադրութեան մէջ որոշուած է հետեւեալը՝

ժառանգաբար հաստատել բէգերի վերայ այն բնակեցրած և ոչ բնակեցրած հողերը, որոնցից նոքա այն ժամանակ օգտուում էին, վերադարձնելով նրանց և այն մէկելները, որ մի քանիսներից խլւած էին.

Ընդունել այդ հողերի վերայ բնակող գիւղացիներին իբր պետական գիւղացիների, յանձնելով նոցա ոստիկանական կառավարութիւնը հողատէրերին:

Պարտաւորացնել այս գիւղացիներին զանազան տուրքերով յօգուտ հողատէրերի

Աղալարների մասին որոշւեց՝

Իշխան Վօրօնցօւի կարծիքների գլխաւոր հիմունքները թէ բէգերի և թէ աղալների նկատմամբ՝ հաստատել.

Այդ կերպ նրանց ցոյց ուրւած ողորմածութիւնը, յայտարարել նրանց ոչ իրաւունքի ձեռով, այլ Թագաւոր կայսեր առանձին ուշադրութեան և զԹառատութեան ձեռով.

Թողնել Կովկասեան փոխարքային, նորա այցելութեան ժամանակ երկրի թրքական գաւառներին, յայտարարել աղալարներին և բէգերին, որ Թագաւոր կայսրը, իւր մշտական հոգացողութեան մէջ դէպի նոցա վիճակը, բարեհաճում է պարգևել առաջիններին և առ միշտ հաստատել վերջիններիս վերայ այն կաււածները, սպասելով սակայն, որ թէ նոքա և թէ սոքա եռանդոտ ծառայութիւնով իրանց միանգամայն արժանի ցոյց կը տան նորին Մեծութեան բարձր ողորմածութեանը դէպի նրանց:

Այսպէս ուրեմն, բէգերին և աղալարների վերայ հաստատուեցին այն բոլոր հողերը, որոնցից նոքա մի ժամանակ օգտուում էին Բայց մեծապէս հետաքրքրական է իմանալ, թէ, ալդ նոր կանօնադրութիւնով, ինչուեմն էին կայանում գիւղացիների պարտաւորութիւնները դէպի բէգերը և աղալարները: Նոցա հողերի վերայ բնակող գիւղացիները պարտական էին բէգերին և աղալարներին անձնական ծառայութիւններով և բանւորութիւնով, տնտեսութեան առարկաների մասով և հողալին բերքերի մի հինգերորդ մասով ամեն մէկի հողաբաժինից, որ որոշւած էր հինգ դեսիատին ամեն մի աշխատող հոգու համար: Քաղաքներում ապրող և տէրունական հողերում բնակող գիւղացիներն էլ պարտական էին բէգերի օգտին զանազան տուրքերով, ըստ վագեմի սովորութեան՝ փողով, անձնական ծառայութիւնով և կամ արհեստի առարկաներով: Գիւղացիները զրկւում էին իրաւունքից թողնել իրանց հողաբաժինները և անցնել բնակութեան նոր տեղեր: Բէգերին և աղալարներին տրւեց ոստիկանական իրաւունք գիւղացիների վերայ, դատելու իրաւունք ոչ քրէական յանցանքների համար, և իրաւունք՝ գիւղացիներին մարմնապէս պատժել մինչև ոօզդու 25 հարւածը:

Այսպիսով, որպէս տեսնում ենք, կալաածատիրական գիւղացիները, բէգերի և աղալարների նկատմամբ, նոյն դիրքի մէջ դրւեցին, ինչպէս ռուսաց ճորտ գիւղացիները Ռուսաստանում իրանց հողատէրերի նկատմամբ:

Այդ առաջարկութեան մանրամասնութիւնների մէջ մտնելու առիթով, թէ Կովկասեան Կովտէտի և թէ մինիստրների ու իշխան Վ. օրօնցուի մէջ եղան սաստիկ մեծ տարաձայնութիւններ, որոնց հետեանքն եղաւ 6 դեկտ. 1846 թ. օրէնքը, ուր առաջին անգամ օրէնքի խօսքով յայտնւեց, որ Թրքական գաւառներում ճորտութիւն երբէք գոյութիւն չի ունեցած, հետեաբար և փոխւեց վերևի կանօնադրութիւնը: Այդ մասին սակայն մի այլ անգամ: